

**Govor predsjedatelja Zastupničkog doma Parlamentarne skupštine Bosne i Hercegovine dr. Denisa Bećirovića na 125. Skupštini Interparlamentarne unije u okviru panel diskusije "Preraspodjela siromaštva, ne samo bogatstva".
Bern, 19. listopada 2011.**

Poštovani gospodine predsjedniče,

Poštovani delegati!

Dame i gospodo!

Poštovani gosti!

Čast mi je i zadovoljstvo u svojstvu predsjedavajućeg Predstavničkog doma Parlamentarne skupštine BiH obratiti vam se danas na ovom jubilarnom zasjedanju Skupštine Interparlamentarne unije. Zasjedanja Interparlamentarne unije oduvijek su bili prilika da se parlamentarci država okupe i razmjene mišljenja o situaciji u svijetu i pokušaju naći optimalna rješenja za globalne probleme. Jedan od najvećih problema s kojima se svijet suočava jeste siromaštvo, glad i svjetska ekonomska kriza, koja predstavlja najveću prijetnju međunarodnom miru i sigurnosti.

Borba protiv siromaštva je vrlo složena, posebno u vremenima u kakvim smo danas. Zato neprestano moramo ne samo upozoravati da na Zemlji živi više od milijardu ljudi koji se bore za dnevno preživljavanje, nego uložiti permanentan napor kako bi iskorijenilo ekstremno siromaštvo. Više je nego očigledno da se zemlje ne mogu boriti pojedinačno te da globalni problemi traže i globalna rješenja.

Svi mi koji smo danas ovdje saglasni smo da je potrebno raditi zajedno. Ako želimo uspostaviti stabilan mir, moramo pronaći način kako da ljudima omogućimo normalan život. To nas upućuje na alramantnu korekciju nejednakosti na globalnom nivou.

Naime, živimo u vremenu gdje bogati postaju bogatijim a siromašni su i dalje siromašni. U tom prevelikom jazu postaje sve jasnije da jedino boljom socijalnom politikom i pravičnijom preraspodjelom društvenih bogatstava možemo napraviti dobar početak ka cilju smanjenja broja siromašnih.

Smatram da je nužno uključiti cjelovito redefiniranje pravila svjetske trgovine koja sada štiti bogate, te primijeniti nove modele razvoja. Krucijalni akcenat trebalo bi da bude na tome da se siromašnim zemljama omoguće nova rješenja za smanjenje stope siromaštva i postizanje održivog razvoja. Iskorjenjivanje siromaštva zahtijeva koordinaciju poteza razvijenog i nerazvijenog dijela svijeta, kao i saradnju unutar samih država u razvoju. Rezultat ove saradnje trebalo bi da bude globalna vizija i dogovor svih nas o koracima koji vode ka postizanju ovog cilja.

Više je nego jasno da će se bitka s ovim problemom lakše dobiti ako svi ujediniemo svoje napore, sarađujemo i međusobno se podstičemo na podršku.

Ubijeđen sam da iskorjenjivanje globalnog siromaštva nije samo daleki san, nego dostižan cilj i imperativ svima nama. Apeliram da napravimo zajedničku sveobuhvatnu strategiju, kao i mobilizaciju svih raspoloživih resursa kako bismo iskorijenili siromaštvo.

Mi u Bosni i Hercegovini dajemo punu podršku svim strategijama, aktivnostima i socijalnim politikama koje rade na iskorjenjivanju siromaštva i pravednijoj preraspodjeli dobara. Zajedno sa svima vama želimo pronaći etički i politički prihvatljiv put koji će nam omogućiti da započnemo i nastavimo zajedno ulagati napore u postizanju pravednijeg društva i socijalne pravde.

Hvala na pažnji.